

Malaysia Rancang Jenama Semula Minyak Sawit Dengan Skim Pensijilan Bernama
22 Januari, 2013

PUTRAJAYA, 22 Jan (Bernama) -- Malaysia merancang melaksanakan penjenamaan semula minyak sawit dengan prospek mewujudkan skim pensijilan sendiri.

Menteri Perusahaan Perladangan dan Komoditi Tan Sri Bernard Dompok berkata proses penjenamaan semula itu merupakan usaha untuk membezakan minyak sawit Malaysia dengan sumber lain berikutan komoditi itu telah melalui kawalan kualiti dan penguatkuasaan yang ketat dan sistematik.

"Proses penjenamaan semula ini bertujuan memaklumkan kepada dunia mengenai produk Malaysia dan bagaimana ia dihasilkan serta keyakinan kita bahawa ia mematuhi prinsip-prinsip penerimaan umum seperti yang termaktub dalam 3P iaitu penduduk, bumi dan keuntungan.

"Kita dapat memenuhi ketiga-tiga aspek industri minyak sawit," katanya kepada pemberita selepas menutup bengkel mengenai Penjenamaan semula Minyak Sawit Malaysia, Selasa.

Dompok bagaimanapun berkata idea itu masih dalam peringkat perbincangan dan lebih banyak bengkel akan diadakan bagi membincangkan idea itu selain mendapatkan maklum balas daripada pemegang kepentingan.

Ditanya mengenai tindakan India mengenakan cukai import ke atas minyak sawit mentah (MSM) dan minyak masak, Dompok berkata memandangkan Malaysia tidak mempunyai duti eksport ke atas produk siap dan MSM pada jalur harga semasa, pasaran bagi produk Malaysia mungkin menyaksikan peningkatan berbanding negara yang mengenakan cukai eksport.

"Ia juga meletakkan Malaysia pada kedudukan yang sama dengan negara lain, termasuk Indonesia," katanya.

Minggu lepas, India mengumumkan import MSM dan kacang soya akan dikenakan cukai 2.5 peratus manakala tarif pembelian minyak masak bertapis akan dikekalkan pada 7.5 peratus.

Mengenai pekerja perladangan Bangladesh, Dompok berkata 40,000 pekerja akan dibawa masuk ke Malaysia pada asas kerajaan dan kerajaan, dengan kumpulan pertama 10,000 pekerja dijangka tiba bulan depan.

Ditanya mengenai kenyataan Ketua Pembangkang Datuk Seri Anwar Ibrahim bahawa struktur cukai minyak sawit Malaysia perlu dikaji semula, Dompok berkata struktur sedia ada memadai dan memenuhi kepentingan semua pemegang kepentingan.

"Mengenai duti eksport, kami sudah mengambil kira dua perkara iaitu memastikan peladang kelapa sawit tidak terlalu dibebankan serta meletakkan kilang penapis di Malaysia pada kedudukan yang sama dengan kilang penapis lain di rantau ini supaya mereka tidak tertakluk kepada pembelian stok yang mahal," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v6/bm/newsindex.php?id=923592>